

**ADMINISTRACIÓN LOCAL****MUNICIPAL****TOMIÑO****Ordenanzas e Regulamentos***APROBACIÓN DEFINITIVA DE MODIFICACIÓN DA ORDENANZA DE BIOMASA***O PLENO DO CONCELLO DE TOMIÑO NA SÚA SESIÓN DO 30 DE NOVEMBRO DE 2018  
ADOPTO O ACORDO DE APROBACIÓN DEFINITIVA MODIFICACIÓN ORDENANZA XESTIÓN  
BIOMASA**

Durante o correspondente trámite de información pública (publicacións no BOP mércores 3 de outubro do 2018 e Diario Atlántico de 25 de setembro de 2018) a *Federación Empresarial de Aserraderos y Rematantes de Maderas de Galicia* (FEARMAGA) que foi obxecto do correspondente debate introducíndose na redacción da ordenanza, o texto resultante da correspondente votación.

**APROBACIÓN DEFINITIVA MODIFICACIÓN DA ORDENANZA MUNICIPAL DA XESTIÓN  
DA BIOMASA E DISTANCIAS DE PLANTACIÓNS DO CONCELLO DE TOMIÑO****EXPOSICIÓN DE MOTIVOS**

De conformidade coa potestade regulamentaria atribuída polos artigos 4.1 da Lei 7/1985, de 2 de abril, reguladora do Réxime Local e 6.1 da Lei 5/1997, do 22 de xullo, reguladora da Administración Local de Galicia, o Concello de Tomiño propónse a adaptación da ordenanza municipal da xestión da biomasa os novos criterios establecidos na Lei 2/2017, de medidas fiscais, administrativas e de ordenación e a Lei 9/2017 de medidas fiscais e administrativas que modificaron a Lei 3/2007, do 9 de abril, de prevención e defensa dos incendios forestais de Galicia e a Lei 7/2012, de 28 do xuño, de montes de Galicia.

**CAPÍTULO I  
DISPOSICIÓN XERAIS****Artigo 1.-Fundamento**

A presente ordenanza e de aplicación no marco do disposto na Lei 7/2012, de 28 de xuño, de montes de Galicia, na Lei 3/2007, de 9 de abril, de prevención e defensa contra os incendios forestais de Galicia e tamén na Lei 2/2016 de 10 de Febreiro, do solo de Galicia e o decreto 143/2016, do 22 de setembro, polo que se aproba o regulamento da Lei 2/2016, do solo de Galicia.



Xoves, 13 de decembro de 2018

Núm. 239

## Artigo 2.-Finalidade

Esta ordenanza ten natureza non fiscal, e a súa finalidade é establecer as condicións para levar adiante as xestións da biomasa e a fixación das distancias para plantacións nos terreos clasificados como urbanos, de núcleo rural ou urbanizables sitios no termo municipal de Tomiño

## Artigo 3.- Ámbito de aplicación

A presente ordenanza é de obrigado cumprimento para as persoas responsables conforme ao definido no artigo 4, que teñan os seus terreos dentro do termo municipal de Tomiño.

Conforme o disposto no artigo 4.2 da Lei 5/1997, de 22 de xullo, reguladora da Administración local de Galicia, a presente Ordenanza será de aplicación en todo o non previsto pola lexislación básica.

## Artigo 4.- Persoas responsables

A efectos de esta Ordenanza, entenderase como persoas responsables as persoas físicas ou xurídicas titulares do dereito de aproveitamento sobre os terreos urbanos, urbanizables ou de núcleo rural, así como as administracións, as entidades ou sociedades que teñan encomendada a competencia sobre a xestión, ou cedida esta en virtude dalgunha das formas previstas legalmente, das vías de comunicación e das liñas de transporte de enerxía eléctrica, sobre os tipos de solo referidos anteriormente

## 5.-Definicións

Aos efectos desta ordenanza, defínense os seguintes termos:

- **Solo urbano:** Terreos que o planeamento urbanístico (Plan Xeral de Ordenación Municipal) tivera definido e clasificado como tal en virtude do disposto no artigo 16 da Lei 2/2016.
- **Núcleos rurais:** Terreos que se incluían dentro dos núcleos rurais delimitados no planeamento municipal, de conformidade co disposto no artigo 23 da Lei 2/2016.
- **Solo urbanizable:** Constituirán o solo urbanizable os terreos que o planeamento estime necesarios e adecuados para permitir o crecemento da poboación e da actividade económica ou para completar a súa estrutura urbanística nos termos fixados no artigo 27 da Lei 2/2016.
- **Repoboación forestal:** Introducción de especies forestais nun terreo mediante sementeira ou plantación
- **Especie forestal:** Especie arbórea, arbustiva, de matogueira ou herbácea que non é característica de forma exclusiva do cultivo agrícola.



- **Xestión da biomasa:** A creación e mantemento da descontinuidade horizontal e vertical da carga de combustible, a través do control ou eliminación parcial ou total da biomasa vexetal por medio do emprego das técnicas máis recomendables e coa intensidade e frecuencia para o cumprimento do obxecto previsto nesta ordenanza. Tendo en conta que os terreos situados en solo urbano, de núcleo rural ou urbanizable teñen unha natureza residencial ou habitacional, polo que os riscos para os bens e as persoas, por motivos de incendios de vexetación, deben minorarse drasticamente e primar a seguridade.

## CAPÍTULO II DA XESTIÓN DA BIOMASA

### Artigo 6.-Xestión da biomasa

As persoas responsables terán a obriga de xestionar a biomasa das fincas incluídas en solo urbano, urbanizable ou de núcleo rural conforme os criterios establecidos nesta Ordenanza, así como mantelas nas debidas condicións de seguridade e salubridade, debendo proceder a súa desinfección e desratización periódica.

### Artigo 7.-Criterios de xestión da biomasa

1.-Consonte o disposto na Lei 3/2007, de prevención e defensa contra os incendios forestais de Galicia, as persoas responsables dos terreos ubicados en solo urbano, urbanizable ou de núcleo rural deberán acometer os criterios da xestión da biomasa establecidos neste artigo para cada clase de terreo, incluída de ser o caso, a retirada de especies arbóreas, antes de que remate o mes de maio de cada ano.

2.-Nos terreos clasificados como solo urbano, solo de núcleo rural e solo urbanizable, as persoas responsables deberán facer a xestión da biomasa na totalidade da parcela conforme os seguintes criterios:

- a) Roza para a eliminación do estrato herbáceo e arbustivo sempre que supoña un mínimo risco para a propagación dos incendios incontrolados de vexetación. A altura máxima da vexetación, arbustiva e herbácea, é a que consta no cadro adxunto, variando en función da porcentaxe de cobertura do solo, segundo o establecido na orde de 31 de xullo de 2007 pola que se establecen os criterios para a xestión da biomasa vexetal.
  - % do solo cuberto <20:  
Altura máxima da vexetación (cm): 100.
  - % do solo acuberto 20 a 50:  
Altura máxima da vexetación (cm): 40.
  - % do solo cuberto > 50:  
Altura máxima da vexetación (cm): 20.



Xoves, 13 de decembro de 2018

Núm. 239

- b) Poda e rareo do estrato arbóreo de forma que se manteña unha discontinuidade horizontal entre as copas das árbores e vertical entre estas e os estratos herbáceo e arbustivo. A distancia entre plantas será, como mínimo, de 7 metros e mantendo as copas tanxentes. A poda debe ser do 35% da altura da árbore ata que esta atinxa os 11,4 metros, altura a partir da cal a poda debe alcanzar o mínimo de 4 metros por riba do solo. Estes criterios non serán aplicables en parques e xardíns municipais, árbores senlleiras ou aquelas que cumpran funcións ornamentais ou se atopen illadas e non supoñan un mínimo risco para a propagación de incendios incontrolados de vexetación.

3.-Nos espazos previamente definidos como redes secundarias de faixas de xestión de biomasa nos plans municipais de prevención e defensa contra os incendios forestais, será obrigatorio para as persoas responsables, nos termos establecidos no artigo 21 ter da Lei 3/2007 de prevención e defensa contra os incendios forestais de Galicia, xestionar a biomasa vexetal nunha franxa de 50 metros perimetral o solo urbano, de núcleo rural e urbanizable, así como arredor das edificacións, vivendas illadas, urbanizacións, depósitos de lixo, cámpings, gasoleiras e parques e instalacións industriais situados a menos de 400 metros do monte e arredor das edificación illadas en solo rústico situadas a mais de 400 metros do monte.

Con carácter xeral na mesma franxa de 50 metros mencionada non poderá haber árbores das especies sinaladas no Anexo 1 desta Ordenanza. As distancias mediranse dende o límite do solo urbano, de núcleo rural ou urbanizable, dende os paramentos exteriores das edificacións, vivendas illadas, urbanizacións, ou s límites das súas instalacións anexas, dende o límite das instalacións nos casos de depósitos de lixo, gasoleiras e parques e instalacións industriais e dende o peche perimetral no caso dos campings.

4.-Tal e como establece a disposición transitoria terceira da Lei 3/2007 de prevención e defensa contra os incendios forestais de Galicia, mentres non se definan as redes secundarias de faixas de xestión da biomasa nos plans municipais de prevención e defensa contra os incendios forestais, serán directamente aplicables as obrigas derivadas do disposto no artigo 21 desta Lei, descritas no punto 3 desta ordenanza

### **Artigo 8.- Procedemento para a xestión da biomasa**

No suposto de incumprimento do establecido no numero anterior, a administración pública competente, de oficio ou por solicitude de persoa interesada, enviará a persoa responsable unha comunicación na que se lle recordará a súa obriga de xestión da biomasa vexetal e retirada de especies arbóreas prohibidas e se lle concederá para facelo un prazo máximo de quince días naturais, contado desde a recepción da comunicación, no caso ser necesaria autorización de organismos distintos do Concello para executar os traballos obrigatorios de xestión da biomasa, se suspenderá o prazo concedido no apercebimento dende que o Concello teña constancia de que o interesado presentou a solicitude de autorización ata que a corta sexa autorizada polo órgano competente.



## Artigo 9.-Execución subsidiaria

Se as persoas responsables non realizasen os traballos de xestión da biomasa nos prazos fixados polo Concello, este poderá levar a diante os mesmos, logo do previo apercibimento en forma e sen prexuízo da imposición, previo a tramitación do oportuno expediente, das sancións procedentes.

Os custos derivados deses traballos serán repercutidos, se é o caso, as persoas responsables, procedendo, de ser o caso, ao cobro dos gastos que se ocasionen ao Concello a través do procedemento de apremio.

Se a execución subsidiaria inclúe a retirada de especies arbóreas prohibidas a administración poderá como medida cautelar proceder o comiso das indicadas especies. O destino das especies obxecto de comiso será o seu alleamento, o cal será efectuado, nos termos regulados na Lei 3/2007, de prevención e defensa contra os incendios forestais de Galicia.

No caso de que os custos acumulados da execución subsidiaria dos traballos de xestión da biomasa que a administración asumise con cargo ao seu orzamento, e que non lle poida repercutir a aquela por descoñecerse a súa identidade, superen o valor catastral da parcela poderá ser causa de expropiación forzosa por interese social. A administración que asumise eses custos con cargo ao seu orzamento terá a condición de beneficiaria da expropiación forzosa e compensará, no momento do aboamento do prezo xusto expropiatorio, as cantidades debidas pola persoa propietaria por este concepto, sempre que non teñan prescrito os correspondentes dereitos de cobramento a favor da Facenda pública.

## CAPÍTULO III DAS DISTANCIAS DAS PLANTACIÓNS

### Artigo 10.-Prohibicións e Distancias das repoboacións forestais e plantacións

1.-De conformidade co disposto na Lei 7/2012 de Montes, quedan prohibidas as repoboacións forestais nos terreos clasificados como solo urbano, urbanizable e de núcleo rural e nos terreos urbanizables os que de acordo coa disposición transitoria primeira sa Lei 2/2016, do 10 de Febreiro, do solo de Galicia se lles aplique o disposto nesta Lei para o solo rústico.

2.-No seu caso as repoboacións forestais preexistentes antes da entrada en vigor da Lei 7/2012 de Montes, deberán adecuarse para gardar respecto das edificacións, vivendas illadas, pozos e instalacións industriais, a distancia mínima de 15 metros cando se trate de especies frondosas (Anexo II desta Ordenanza) e de 50 metros no resto de especies, tal e como establece a Lei 7/2012 de montes de Galicia. No caso de existir dúbidas sobre a existencia dunha edificación para a aplicación deste artigo, a administración poderá solicitar certificado de empadramento ou recibo dalgún dos tributos municipais para a súa verificación.



Xoves, 13 de decembro de 2018

Núm. 239

3.- Nos supostos de plantacións de árbores frutais, setos ou árbores ornamentais as distancias serán as fixadas na correspondente ordenanza urbanística deste Concello, e de non existir serán as fixadas pola normativa que resulte de aplicación.

4.—Camiños públicos: Os propietarios de terreos lindantes con camiños públicos ou vías urbanas, deberán manter libres de maleza ou árbores o espazo de dous metros medidos horizontalmente dende a marxe da vía de acordo coa relación de especies establecidas na Disposición Adicional Terceira da Lei 3/2007 de 9 de abril de prevención de defensa contra os incendios forestais de Galicia, ademais en calquera plantación que dea orixe ao seu arborado sobrevoe ou irrompa coas raíces en camiños públicos e vías urbanas, os propietarios deberán adoptar medidas que impidan tales ocupacións, tanto do solo como do subsolo e do espazo aéreo, incluídos árbores illados.

### **Artigo 11.-Licenzas e permisos para talas**

1.-As talas e os abatementos de árbores que constituían masa arbórea, espazo boscoso, arboreda ou parque en solo urbano, núcleo rural e urbanizable estarán suxeitas a obtención da previa licenza municipal por parte deste Concello.

2.-Así mesmo segundo o establecido na disposición transitoria quinta da Lei 7/2012 de Montes, o aproveitamento das masas forestais existentes no momento da entrada en vigor da Lei 7/2012 en solos urbanizables estará sometido ao réxime de autorizacións da citada Lei ata o desenvolvemento urbanístico dos citados solos, momento en que precisarán da licenza municipal descrita no punto 1 deste artigo.

## **CAPÍTULO IV RÉXIME SANCIONADOR**

### **Artigo 12.-Competencia**

Corresponde ao Concello de Tomiño a través da alcaldía ou concelleiro no que delegue, a inspección e sanción das infraccións, previa a instrución do correspondente expediente, das obrigas reguladas nesta Ordenanza.

Cando se detecten infraccións de índole penal ou de competencia doutras Administracións darase conta inmediata das mesmas a autoridade ou organismo que corresponda.

### **Artigo 13.-Clasificación das infraccións**

Considéranse infraccións administrativas en relación coas materias as que se refire esta Ordenanza, os actos ou omisións que contraveñan o establecido nas normas que integran o seu contido.

As infraccións clasificaranse en leves, graves e moi graves.



#### **Artigo 14.- Infraccións leves**

- a) Constitúe infracción leve as condutas constitutivas de infracción reguladas nesta ordenanza cando non deban cualificarse como graves ou moi graves.
- b) Non proceder a xestión da biomasa cos criterios regulados nesta ordenanza.

#### **Artigo 14.-Infraccións graves**

- a) Non proceder á xestión da biomasa cos criterios establecidos nesta Ordenanza, unha vez notificada a súa obriga e despois de serlle notificada a valoración do custo das mesmas, cando exista risco inminente e de incendio para as vivendas e persoas.
- b) Non permitir o acceso ao persoal de vixilancia a inspección dos terreos.
- c) A negativa a subministrar información a autoridade municipal, funcionarios e axentes en cumprimento das súas funcións.
- d) A realización de plantacións sen gardar as distancias establecidas na presente Ordenanza.
- e) A realización de plantacións nos lugares expresamente prohibidos na presente Ordenanza.
- f) A reincidencia en infraccións leves. Enténdese que existe reincidencia pola comisión no termo dun ano dunha infracción leve, cando así fose declarado por resolución firme.

#### **Artigo 15.-Infraccións moi graves**

- a) Cando houbese grave repercusión nos recursos naturais.
- b) A reincidencia en infraccións graves. Entendese que existe reincidencia pola comisión no termo dun ano dunha infracción grave, cando así fose declarado por resolución firme.
- c) A resistencia, coacción ou ameaza a autoridade municipal, funcionarios e axentes.

#### **Artigo 16.-Sancións**

As sancións aplicables serán as seguintes:

- a) Por infraccións leves, multas dende 100 a 600 euros.
- b) Por infraccións leves, multa dende 601 a 1.500 euros.
- c) Por infraccións graves, multa dende 1.501 a 3.000 euros

As sancións graduaranse en función dos seguintes criterios:

- a) Grado de intencionalidade
- b) Contía do beneficio obtido
- c) Natureza dos prexuízos causados



Xoves, 13 de decembro de 2018

Núm. 239

## Disposición adicional

Como Anexo I a esta Ordenanza inclúese a relación de especies non permitidas nas redes secundarias de xestión da biomasa, recollidas na disposición adicional 3ª da Lei 3/2007 de prevención e defensa contra os incendios forestais e como Anexo II a relación de especies de frondosas, recollidas no Anexo I da Lei 7/2012 de montes de Galicia.

### ANEXO I

#### Relación de especies non permitidas nas redes secundarias da xestión da biomasa

Piñeiro do país, piñeiro silvestre, piñeiro de Monterrey, Piñeiro de Oregón, mimosa, acacia negra, eucalipto, queiruga, carqueixa, xesta, carpaza, piorno, fento, silva e toxo.

### ANEXO II

#### Relación de especies de Frondosas

Ameneiro, pradairo, bidueiro, freixo, castiñeiro, cerdeira, carballo, cerquiño, sobreira, carballo albar, aciñeira, abeleira, umeiro, loureiro, sorbeira do monte, capudre, nogueira e herbedo.

## Disposición final

A promulgación futura e entrada en vigor da normas de rango superior ao desta ordenanza que afecten as materias reguladas na mesma determinará a aplicación automática daquelas, sen prexuízo dunha posterior adaptación, no que fose necesario da Ordenanza.

## Disposición derogatoria

Quedan derogadas todas as disposicións municipais que contraveñan o disposto na presente Ordenanza.

## Disposición derradeira

A modificación da presente Ordenanza entrará en vigor tras a súa aprobación definitiva, unha vez publicada integramente no Boletín Oficial da provincia de Pontevedra e transcorrido o prazo a que se refire o art. 65.2 da Lei 7/85 do 2 de abril, reguladora das bases de réxime local, permanecendo en vigor ata a súa modificación ou derogación expresa.

Tomiño.

A alcaldesa

*Sandra González Álvarez*

